



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՑԻՀԱՆՁՆԱԺՈՂՈՎ

ՈՐՈՇՈՒՄ

06 մայիսի 2022 թվականի թիվ 63-Ա

ք. Երևան

«ՓԻ ԲԻ ՍԻ» ՍՊ ԸՆԿԵՐՈՒԹՅԱՆ ՆԿԱՏՄԱՍԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով դիմումի հիման վրա 2022 թվականի մարտի 22-ին հարուցված թիվ 6 վարչական վարույթի նյութերը՝ *պարզեց*:

2022 թվականի մարտի 22-ին Հանձնաժողով մուտքագրված «ՍՈՒԻԴ ՓԱՐԹՆԵՐ» ՍՊ ընկերության (այսուհետ՝ դիստրիբյուտոր) դիմում-գանգատում նշված է «ՓԻ ԲԻ ՍԻ» ՍՊ ընկերության (այսուհետ՝ Հեռարձակող) կողմից ոչ սեփական տեսալսողական հաղորդումն առանց դրանց հեռարձակման իրավունքը հավաստող փաստաթղթերի հեռարձակելու փաստի վերաբերյալ:

Ըստ դիստրիբյուտորի՝ Հեռարձակողի կողմից առանց հեռարձակման իրավունքը հավաստող փաստաթղթերի 2022 թվականի փետրվարի 28-ին «Ֆիլմզոն» տեսալսողական ծրագրով հեռարձակվել է «THE BAR» («Дикая история» 1x102 Արգենտինա, Իսպանիա 2017թ.) ֆիլմը (այսուհետ՝ Ֆիլմ), որի Հայաստանի Հանրապետությունում տարածելու բացառիկ իրավունքը պատկանում է «ՍՈՒԻԴ ՓԱՐԹՆԵՐ» ՍՊ ընկերությանը: Դիստրիբյուտորը հայտնել է նաև, որ պայմանագրային պարտավորություն է կրում իրավատիրոջ հանդեպ՝ իր իրավունքները երրորդ անձանց խախտումներից պաշտպանելու ուղղությամբ:

Դիմում-գանգատում նշված է նաև, որ դիստրիբյուտորի և Հեռարձակողի միջև ոչ սեփական տեսալսողական հաղորդումների հեռարձակման իրավունքի տրամադրման լիցենզիոն պայմանագիր կնքված չէ, որը թույլ կտար Հեռարձակողին Հայաստանի Հանրապետության տարածքում հեռարձակել Ֆիլմը և խնդրում է իրավախախտման հանգամանքը պարզելու դեպքում Հեռարձակողին ենթարկել համապատասխան պատասխանատվության:

Դիստրիբյուտորը Հանձնաժողով է ներկայացրել 2021 թվականի դեկտեմբերի 13-ին «PRINE TIME MEDIA LLC» ընկերության հետ կնքված բացառիկ լիցենզիոն պայմանագիրը (կից Հավելվածներով), համաձայն որի Հայաստանի Հանրապետության տարածքում Ֆիլմը տարածելու օգտագործման իրավունքը պատկանում է իրեն:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի ա) կետով և հիմք ընդունելով դիստրիբյուտորի դիմումը՝ 2022 թվականի մարտի 22-ին Հեռարձակողի նկատմամբ հարուցել է վարչական վարույթ:

Հանձնաժողովը հարուցված վարչական վարույթի մասին 2022 թվականի մարտի 23-ին ծանուցել է Հեռարձակողին և հայտնել, որ այս հարցի վերաբերյալ կարող են ներկայացնել իրենց պարզաբանումները, բացատրությունները:

Հարուցված վարչական վարույթի ընթացքում Հեռարձակողը 2022 թվականի մայիսի 03-ին Հանձնաժողով հասցեագրված գրությամբ տեղեկացրել է, որ Հանձնաժողովի կողմից ծանուցմամբ նշված «THE BAR» («Дикая история» 1x102 Արգենտինա, Իսպանիա 2017թ.) ֆիլմը՝ «ՓԻ ԲԻ ՄԻ» ՍՊ ընկերության կողմից չի ցուցադրվել: Միաժամանակ Հեռարձակողը խնդրել է կարճել հարուցված վարչական վարույթը:

Հանձնաժողովի հիմնավորումները (պատճառաբանությունը) և եզրահանգումը.

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

Փաստում ենք, որ Հանձնաժողովի 2020 թվականի սեպտեմբերի 18-ի թիվ 109-Ա որոշմամբ «ՓԻ ԲԻ ՄԻ» ՍՊ ընկերությունը հեղինակագործվել է (ՀՎ N 020) և վերջինիս տրվել է տեսալսողական մեդիաձառայություն մատուցողի կարգավիճակ:

«Տեսալսողական մեդիայի մասին» օրենքի 10-րդ հոդվածի 3-րդ մասի համաձայն՝ ոչ սեփական տեսալսողական հաղորդումները կարող են հեռարձակվել միայն դրանց հեռարձակման իրավունքը հավաստող փաստաթղթերի առկայության դեպքում:

Այսպիսով, վարչական վարույթի նյութերի ուսումնասիրության և համադրման արդյունքում Հանձնաժողովն ամրագրում է, որ Օրենքով Հեռարձակողների համար պարտավորություն է սահմանված՝ ոչ սեփական տեսալսողական հաղորդումները հեռարձակել միայն դրանց հեռարձակման իրավունքը հավաստող փաստաթղթերի առկայության դեպքում:

Վարչական վարույթի շրջանակներում Հեռարձակողը Հանձնաժողով ներկայացրել է բացատրություն, որ խնդրո առարկա հանդիսացող Ֆիլմն իր կողմից չի վերահաղորդվել: Փաստենք նաև, որ Հանձնաժողովի կողմից դիստրիբյուտորին գրությամբ առաջարկվել է, որ եթե ունեք «ՓԻ ԲԻ ՄԻ» ՍՊ ընկերության կողմից «Ֆիլմոն» տեսալսողական ծրագրով «THE BAR» («Дикая история» 1x102 Արգենտինա, Իսպանիա 2017թ.) ֆիլմի ցուցադրված լինելու ապացույց, ապա այն կարող եք այն սույն վարչական վարույթի շրջանակներում ներկայացնել Հանձնաժողով: Դիստրիբյուտորի կողմից ոչ մի ապացույց չի ներկայացվել:

Հանձնաժողովի կողմից ուսումնասիրվել են վարչական վարույթի մասնակիցների կողմից ներկայացրած փաստերը և «Տեսալսողական մեդիայի մասին» օրենքի խախտում չի հայտնաբերվել:

Այսպիսով, հաշվի առնելով այն փաստը, որ Հեռարձակողի և դիստրիբյուտորի միջև չի կնքվել տեսալսողական ծրագրերի վերահաղորդման իրավունքի տրամադրման պայմանագիր, իսկ Հեռարձակողը իր դիմումում նշում է այն մասին, որ Ֆիլմը իր կողմից չի վերահաղորդվել, ուստի վարչական վարույթի բազմակողմանի, լրիվ և օբյեկտիվ

քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով Հեռարձակողի նկատմամբ հարուցված թիվ 6 վարչական վարույթը ենթակա է կարճման:

Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

1) վարչական իրավախախտման դեպքի կամ կազմի բացակայությունը:

Վարչական իրավախախտումների վերաբերյալ ՀՀ օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

2) գործի վարույթը կարճելու մասին:

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված՝ հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից և հիմք ընդունելով «Տեսալսողական մեդիայի մասին» օրենքի 10-րդ հոդվածի 3-րդ մասի և Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները և Հեռարձակողի 2022 թվականի մայիսի 03-ի գրությունը՝ Հեռուստատեսության և ռադիոյի հանձնաժողովը **որոշեց.**

1. Կարճել «ՓԻ ԲԻ ՄԻ» ՍՊ ընկերության նկատմամբ հարուցված թիվ 6 վարչական վարույթը:

2. Սույն որոշումն ուժի մեջ է մտնում այն վարչական վարույթի մասնակիցներին պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏՍԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀ**

Տ. ՀԱԿՈԲՅԱՆ

06 մայիսի 2022թ.
ք. Երևան